



Mwana wa Mungu Aliye Nafsi Inayojitegemea

Yesu akawaambia, Amin, amin, nawaambia, Yeye Ibrahimu asijakuwako, mimi niko.—Yohana 8:58.

“Ibrahimu, baba yenu, alishangilia kwa vile atakavyoiona siku yangu; naye akaiona akafurahi. Basi Wayahudi wakamwambia, Wewe hujapata bado miaka Hamsini, nawe umemwona Ibrahimu? Yesu akawaambia, Amin, amin, nawaambia, Yeye Ibrahimu asijakuwako, mimi niko.”

Hapa, Kristo anawaonesha kwamba, ingawa wanaweza kufikiria umri wake kuwa chini ya miaka 50, uzima Wake wa kiungu haungeweza kupimwa kulingana na hesabu za kibinadamu. Kuwepo kwa Kristo kabla ya kuutwaa ubinadamu hakupimwi kwa idadi ya miaka (The Signs of the Times, Mei 3, 1899).

“Ibrahimu asijakuwako, mimi niko.” Kristo ni Mwana wa Mungu aliyekuwepo kabla, aliyekuwepo kama nafsi inayojitegemea. Ujumbe aliompata Musa ili awapatie wana wa Israeli ulikuwa hivi, “Ndivyo utakavyowaambia wana wa Israeli, MIMI NIKO amenituma kwenu.”

Nabii Mika anaandika juu Yake, “Bali wewe, Bethlehemu Efrata, uliye mdogo kuwa miongoni mwa elfu za Yuda, kutoka kwako wewe atanitokea mmoja atakayekuwa mtawala katika Israeli; ambaye matokeo yake yamekuwa tangu zamani za kale, tangu milele.”

Kupitia kwa Sulemani Kristo alitamka: “BWANA alikuwa nami katika mwanzo wa njia yake, kabla ya matendo yake ya kale....Alipoipa bahari mpaka wake, kwamba maji yake yasiyasi amri yake; alipoigiza misingi ya nchi; ndipo nilipokuwa pamoja naye, kama stadi wa kazi; nikawa furaha yake ya kila siku; nikifurahi daima mbele zake.”

Akinena juu ya kuwepo kwake kabla, Kristo anapeleka mawazo nyuma hadi katika karne zisizo na mwisho. Anatuhakikishia kwamba kamwe hapakuwa na wakati ambapo hakuwa katika ushirika wa karibu na Mungu wa milele. Yeye ambaye sauti yake Wayahudi walikuwa wakiisikiliza alikuwa pamoja na Mungu kama ambaye alikua pamoja Naye.

Maneno ya Kristo yalinenwa kwa heshima ya utulivu na kwa uhakika na uwezo uliotoa usadikisho kwa mioyo ya waandishi na Mafarisayo. Walihisi nguvu ya ujumbe uliotumwa kutoka mbinguni. Mungu alikuwa akibisha milangoni mwa mioyo yao, akisihi kuingia. (The Signs of the Times, Agosti 29, 1900).

Alikuwa sawa na Mungu, asiye na ukomo na tena mweza wa yote... Yeye ni Mwana aliye nafsi inayojitegemea ya milele (Manuscript 101, 1897).

Katika Kristo, kuna uzima wa milele, usio wa kuazima, hautokani na kingine chochote. “Yeye aliye na Mwana, anao huo uzima” (1 Yohana 5:12). Uungu wa Kristo ni uthibitisho wa muumini wa uzima wa milele. “Yeye aniaminiye mimi,” alisema Bwana Yesu, “ajapokufa, atakuwa anaishi; naye kila aishiye na kuniamini hatakuwa kabisa hata milele.”...Hapa Kristo anaangalia mbele hadi kwenye wakati wa ujio Wake wa mara ya pili (The Desire of Ages, 530).